

SUHARTOK AGINTEA UTZI ZUENeko LEHEN URTEURRENA OSPATZEN ARI ZIREN ATZO IKASLEAK JAKARTAN

Indonesiako Poliziak tiroka sakabanatu du ikasleen manifestazio bat

■ Poliziek airera egin zuten tiro, iturri ofizialen arabera, eta ez zen argitu balak egiazkoak zirenentz

■ Habibie lehendakariaren etxeraino heltzea eragotzi zion Poliziak beste ikasle talde bati

■ Suhartok orain urtebete utzi zuen agintea, herritarrek protesta ugari egin ondoren

Erredakzioa / Donostia

POLIZIAK tiroka sakabanatu zituen atzo ikasleak Legebiltzarraren ataritik, Jakarta hiriburuan. Airera egin zuten tiro, iturri ofizialek esan zuten, eta ez zegoen argi benetako balak erabili zituzten.

Lehenago, ikasleek harriak jaurti zizkieten poliziei, leku-koek adierazi zuten.

Suharto lehendakari ohiak kargua utzi zueneko urteurrena ospatzeko bildu ziren ikasleak Legebiltzarrean. Ikasleen beste talde bat, berriz, Jusuf Habibie presidentearen etxebizitzarantz abiatu zen, baina Poliziak eragotzi egin zion.

Iazko maiatzaren 21ean utzi zuen boterea Suhartok, eta Habibie izendatu zuen kargurako. 32 urtez agindu zuen Suhartok. Jaun eta jabe izan zen denbora tarte horretan, oposiziorik gabe agindu baitzuen.

Legebiltzarrak Suharto aukeratu zuen beste bost urtez agintzeko, iazko otsailan. Eta orduan hasi ziren liskarrak Indonesian. Ikasleek eta herritarrek manifestazioak egin zituzten Suhartok kargua utz zezala exijitzeko, eta istilu larriak gertatu ziren



JONATHAN PERUGIA / AP

Ikasleen eta segurtasun indarren arteko liskarrak atzo Jakartan.

segurtasun indarrekin izandako borroketan. 1.200 herritarrek galdu zuten bizia. Azkenean, Suhartok amore eman zuen nazioarteko egin zion presioagatik.

Ustelkeriagatik Suharto epaitzeko eskatu dute herritarrek harrezkero. Fiskaltza nagusiak, ordea, ez du frogarik «aurkitu» Suharto auzipeitzeko.

Time aldizkariak aste

honetako alean kaleratu du Suhartori buruzko erreportaia bat. Hor azpimarratzen du 15.000 milioi dolarretik gorako dirutza duela Suharto klanak.

Munduko Bankuaren laguntza

Zorrez leporaino utzi zuen Indonesia Suhartok. Ekonomiaren egoera oso larria da,

horregatik Munduko Bankuak 1.100 milioi dolarretako diru laguntza emango dio. Bankuak atzo hartu zuen erabakia, Indonesiak banku sisteman aldaketak egin ditzan eta gizartea babesteko neurriak har ditzan.

Tankerako laguntza jaso zuen Indonesiak iazko uztailan. Mundu Bankuak 1.000 milioi dolar eman zizkion orduan.

Timorko erreferenduma egun bat aurreratu du Jakartak

Agentziak / Jakarta

INDONESIAKO Gobernuak Ekialdeko Timorren autonomiari buruzko erreferenduma egun bat aurreratzera erabaki du.

Muladi Justizia ministroak atzo azaldu zuenez, abuztuaren 8aren ordez 7an egingo da, azkenean, autonomiari buruzko bozketak. Justizia ministroak azaldu zuen abuztuaren 8a igandea dela, hots, katolikoen jaieguna, eta Timorren gehiengo katolikoa delako erabaki zutela erreferenduma aurreratzera.

Nolanahi ere, Indonesian erabaki hori ez du batere ondo hartu Portugalen. Autonomiari buruzko erreferendumaren eguna bien artean adostu zuten, eta ondorioz, Lisboako Gobernuaren iduriko ez da zilegi Indonesiak bere kabuz aldatzea. Jaime Gama Portugalgo Atzerri ministroak nabarmendu zuen Timorko autonomia planaren inguruan nazioarteko akordio bat izan zela, eta beraz, Indonesiak errespetatu egin behar duela.

Ekialdeko Timor Portugalen kolonia izan zen urte askoz, harik eta 1975ean independentzia lortu zuen arte. Orduan, ordea, Indonesiak inbaditu zuen, eta haren menpe dago harrezkero. Orain, Timorri autonomia eskaini dio Indonesiak, eta onartzen ez badu independentzia emateko ere prest agertu da.